

Morning Regional Dogri News Bulletin, 08th Feb, 2025

मार्निंग डोगरी न्यूज़ बुलेटिन, समें. 09-20 Hrs

Headlines

- उपराज्यपाल मनोज सिन्हा होरें आखेआ ऐ जे “कताब मेला” ज्ञान हासल करने दा शौक पैदा करने, पढ़ने दी आदत विकसित करने ते साहित्य समुदाएं दे महत्व गी उजागर करने दा शानदार मौका होंदा ऐ।
- मुख्मन्त्री उमर अब्दुल्ला होरें बजट कोला पैहले आलिण बैठकें दी अध्यक्षता कीती। पुलवामा ते रियासी दिण बजट योजना बारे जन प्रतिनिधिण कन्नै चर्चा कीती।
- डमर अब्दुल्ला होरें जम्मू हॉफ मैराथन ते अल्ट्रा मैराथन 2025 लेई तैआरिण दा सरिस्ता कीता।
- सरकारै सब्बने मैहकमें गी निर्देश जारी कीता ऐ जे लोड़चदी मंजूरी लेई पैहे सरबंधी अपने—अपने बिल 21 रोज पैहले राजभवन च जमा करोआए जान।
- समूलचे जम्मू कश्मीर च सुगम्य यात्रा 2025 दा कामयाब आयोजन।

<><><><><><>

LG-Book

उपराज्यपाल मनोज सिन्हा होरें कल नमीं दिल्ली दे प्रगति मैदान च भारत मंडपम च आयोजित “नमीं दिल्ली विश्व पुस्तक मेला 2025” दा दौरा कीता ते भारत सरकार दे शिक्षा मंत्रालय तैहत नैशनल बुक ट्रस्ट आस्सेआ एह्दे आयोजन लेई मती सराहना कीती। उनें पढ़ने दे शोकीन कताब प्रेमिण, प्रकाशकें ते लखारिण लेई इक सांझा मंच उपलब्ध कराने दी सिफत कीती ते बुक ट्रस्ट गी आखेआ जे ओह जम्मू ते श्रीनगर च बी इस चाल्ली दे कताब मेले नियमित तौरा पर आयोजित कराह। अपने सोशल मीडिया प्लैटफार्म एक्स पर उपराज्यपाल होरें लिखेआ जे नोजवानें च पढ़ने दी आदत ते शोक विकसित करने, साहित्य समुदाये दे योगदान दा चाह मनाने ते उसी उजागर करने, समाज दी सोच दा दायरा बधाने ते नमें लखारिण गी लिखने लेई प्रेरत करने च इस चाल्ली दे आयोजनं दा बड़ा मता महत्व ऐ। उनें आखेआ जे विचारकें, वैज्ञानिक बुद्धिजीविण ते अध्यात्मिक लोकें लेई अपने ज्ञान, चिार ते अनुभव गी दुनिया तगर पजाने दा एह सनेहरी मौका ऐ।

<><><><><><>

CM-Pre Budget

मुख्यमंत्री ओमर अब्दुल्ला होरें अपनी सरकार दे पैहले बजट शा पैहले जम्मू च विधायकें ते जिला विकास कौंसल दे अध्यक्षें कन्नै बैठका लाइयां ते बजट च लोकें दी हिस्सेदारी पर जोर पाया ऐ। सलाह-सुत्तर आहली इ'नें बैठकें च पुलवामा ते रियासी थमां विधायकें, जिला विकास काउंसलें दे अध्यक्षें ते होरनें सरबंधत घडें हिस्सा लैता ते बजट लेई अपने सुझाऽ ते विचार सांझे कीते। इस दरान विधायकें ते डीडीसी मिंबरें ढांचागत विकास, रोजगार दे मौकें ते ग्रामीण अर्थबवस्था गी तगड़ा बनाने, बिजली सप्लाई, होर प्रबंधन, स्कूलें ते अस्पताल च लोडचदी गिनतरी च अमला, पूलें दा निर्माण, सेहत केन्द्रें दा दर्जा बधाने, नमिएं सैलानी थाहरें ते पार्कें दा निर्माण, गडिडियां खडेरने लेई पार्किंग सरबंधी मामलें उप्पर मुख करी ध्यान केन्द्रित कीता गेआ। मुख्यमंत्री होरें जकीन दोआया ऐ जे उंदी सरकार, जम्मू-कश्मीर दे पूरे-पराते ते सामे विकास सने असरदार ढंगगै'नै लोकें दे मसले नबेडने गी तरजीह देग। इस सरबंधे च अपने विचार सांझे करदे होई मुख्यमंत्री ओमर अब्दुल्ला होरें आखेआ जे बजट कोला पैहले इस चाल्ली दा सलाह सूत्र, आम जनता दिएं आस्सें मेदें मताबक बजट तैआर करने च मता कारी दा साबत होंदा ऐ

<><><><><><>

CM- Half Marathon

मुख्यमंत्री उमर अब्दुल्ला होरें कल इक जायजा मीटिंग दी अध्यक्षता करदे होई, इससै ब'रे मगरा आयोजित कीती जाने आलिएं जम्मू हॉफ मैराथन ते अल्ट्रा मैराथन 2025 लेई तैआरिएं बारे चर्चा कीती। आकाशवाणी दे जम्मू संवाददाता नै जानकारी दित्ती ऐ जे मीटिंग दरान मुख्यमंत्री होरें इस पैहल दी सराहना कीती ते आखेआ जे इस आयोजन दे बारे च बड्डे पैमाने पर प्रचार प्रसार कीता जां तो जे मुख्य भरै थमां एथलीट एहदा हिस्सा बनने लेई आकर्षत होग। उमर अब्दुल्ला होरें जम्मू कश्मीर च सैलसफा गी बढावा देने ते जम्मू प्रांतै गी खेड्डें ते साहसिक सैलसफा दी इक टकोहदी थाहरै दे रूपै च पंछान दोआने च, इस चाल्ली दे आयोजनें दे महत्वै पर लोह पाई। उनें आखेआ जे इस मैराथन दी कामयाबी नां छड़ा तंदरुस्ती ते खेड्ड संस्कृति गी बी बढावा देग सगुआं जम्मू प्रांतै गी सैलसफा दे प्रमुख केन्द्रें दे रूपै च पंछान बी देग।

<><><><><><>

Lal Draman Fest

डोडा जिला प्रशासन कल बाल द्रमन स्यालू महोत्सव 2025 दी मेजबानी करने लेई पूरी चाल्ली तैयार ऐ। एहदे लेई सब्बै तैयारियां मुकम्मल करी लैती गेदियां न। इस महोत्सव दा आयोजन जिला प्रशासन आसेआ सैलसफा

मैहकमे, भारतीय सेना ते "तेजस एक पहल" फाउंडेशन दे सहयोग कन्नै कीता जारदा ऐ। महोत्सव दी शुरूआत अज्ज राष्ट्रगान कन्नै होग जेदे बाद सांस्कृतिक प्रदर्शनें, लोक नाटक ते होरनी गतिविधियें सने सहकारी मैहकमे दे स्टालें दा प्रदर्शन बी कीता जाग। एहदे अलावा इस महोत्सव च खेड्ड गतिविधियां, रस्साकशी प्रतियोगिता ते लोकें लेई सेहत कैंप दा बी सरिस्ता कीता जा'रदा ऐ। एहदे कन्नै गै परंपरागत इक लोक नाच, मकामी कला प्रदर्शनियां ते मकामी पकवानें दे स्टाल बी लाए जा'रदे न। इस महोत्सव दे इक हिस्से दे तौरा पर रूक्ख बूहटे लाने आली इक मुहिम दा बी सरिस्ता कीता जाग

<><><><><><>

Money Bills

इक महत्वपूर्ण गेंह अगड़ी पुट्टदे होई जम्मू कश्मीर केन्द्र शासत प्रदेश सरकारै सब्बने मैहकमें गी आखेआ ऐ जे ओह पैहे सरबंधी अपने बिल, एल.जी सचिवालय कोला लोडचदी मंजूरी लेई घट्टोघट्ट 21 ध्याड़े पैहले जमा कराई देन। आकाशवाणी दे जम्मू संवाददाता नै जानकारी दित्ती ऐ जे बजट इजलास कोला पैहले विधि, न्याह ते संसदीय मामले सरबंधी मैहकमे नै एल.जी हुंदी सफारिश लेई एह बिल 21 ध्याड़े पैहले राजभवन च जमा करोआने दा निर्देश मैहकमें गी जारी कीता ऐ। जारी सर्कुलर च आखेआ गेआ ऐ जे जम्मू कश्मीर पुर्नगठन कनून 2019 दी दफा 36 तैहत जिनें प्रस्तावें लेई एल.जी हुंदी सफारिश दी लोड ऐ, ओ 21 दिन पैहले जमा करोआई दित्ते जाने लोडचदे।

<><><><><><>

Sugamya Yatra

दिव्यांगजने लेई सहूलतां जकीनी बनाने ते सामें विकास गी बढ़ावा देने दे मकसद कन्नै इक ऐतिहासक पैहलकदमी सुगम्या यात्रा 2025 दा जंदे रोज केन्द्र शासत प्रदेश दे सब्बने जिलें च कामयाबी कन्नै आयोजन कीता गेआ। आकाशवाणी दे जम्मू संवाददाता दी जानकारी मूजब इनें कार्यक्रमें च दिव्यांगजनें दे अलावा होरने ज्हारा बद्धे लोकें जिंदे च मर्द, महिला ते बच्चे बी शामिल न, बधियै चढियै हिस्सा लेआ। यात्रा दी अगुवाई समाज कल्याण मैहकमे दे दिव्यांग लोकें दे कम्में सरबंधीकमीशनर आस्सेआ दिव्यांगजनें सरबंधी सब्बने जिला सतह दी समितिएं दे सैहयोग कन्नै कीती गई। सुगम्य यात्रा 2025 दा मुख मकसद दिव्यांगजनें गी पेश औने आले दिक्कतें परेशानिएं बारे लोकें गी जानकार बनाना हा ते उंदे पूरे पराते विकास गी जकीनी बनाने लेई समाज दी जिम्मेदारी बारे जागरूकता पैदा करना हा।

<><><><><><>

CS-Samadhan

मुख्य सचिव अटल डुल्लू होर आर्टिफिशल इंटैलीजेंस पर आधारित "समाधान 2.0" पोर्टल दी शुरुआत कीती। नमीं खूबिएं कन्नै लैस इस पोर्टल पर लोकें आस्सेआ दर्ज शकैतें दा नबेड़ा करने लेई एह प्रशासन दी मदाद च मता कारी दा साबत होग। इस मौके पर मुख्य सचिव होरें इस नमें सिरेआ नमित कीते गेदे जन शकैत पोर्टल दी नमीं खासियतें दा आकलन कीता ते एहदी शुरुआत कन्नै लोकें गी हासल होने आली सहूलतें गी बी उजागर कीता। उनें इस पोर्टल दा निर्माण करने आलें गी निर्देश दित्ता जे ओह इस पोर्टल पर क्षेत्र, किन्ने चिर थमां बकाया पेदे मामले, इंदा नबेड़ा, समें सीमा ते इयै जनेह होरने फीचर शामिल करन तां जे शकैतें दा समें सिर ते बवस्थित ढंगै नै नबेड़ा करने च सखाल होए। उनें एह बी सुझाह दित्ता जे इस्से चाल्ली दिएं इक्कै जनेही शकैतें दी पंछान करने लेई आर्टिफिशल इंटैलीजेंस दा इस्तेमाल करन तां जे इनेंगी किट्ठा आनियै समें बद्ध तरीके कन्नै इंदा नबेड़ा जकीनी बनाया जाई सकै।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बशकार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 फरवरी 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>